

# Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: [kontak@nuwelied.info](mailto:kontak@nuwelied.info)  
Webwerf: <http://www.nuwelied.info>

## DIE TEL VAN DIE OMER

Die bestemde tye (feestye, *mo'edim*) van YHVH, soos ondermeer in Levitikus 23 uiteengesit word, word in drie feesseisoene verdeel, naamlik:

- ❖ Die eerste feesseisoen van *Pesag* wat bestaan uit drie opeenvolgende feeste, naamlik: Pesag (Paasfees; Pasga), Fees van Ongesuurde Brood en die Fees van die Eerstelingsgerf (Eerstelinge; Waaioffer).
- ❖ Die tweede feesseisoen van *Shavuot*, ook bekend as Pinksterfees (Fees van Weke).
- ❖ Die derde feesseisoen van *Sukkot*, ook bekend as die Loofhuttefees wat bestaan uit drie opeenvolgende feeste, naamlik: die Fees van Trompette (*Yom Teruah*), Die Dag van Versoening (*Yom Kippur*) en die Fees van Tabernakels (*Sukkot*).

Dit is dus 'n totaal van sewe bestemde tye (afsprake). Op YHVH se jaarlikse afspraakkalender is daar egter nog 'n bestemde tyd wat die Agste Dag (*Sh'mini Atzeret*) genoem word en wat deel vorm van die seisoen van *Sukkot*. In totaal het YHVH dus jaarliks agt 'formele' afsprake met Sy volk – ontmoetings waar Hy die inisiatief neem en 'n uitnodiging aan elkeen van Sy kinders rig. Daar word egter deurgaans verwys na die sewe bestemde tye (feestye) waar die getal 7 op die voltooiing van YHVH se plan dui en dan die Agste Dag wat 'n nuwe begin aankondig. Onthou egter dat die weeklikse Shabbat ook deel is van YHVH se bestemde tye (feeste)(Lev. 23:2) – 'n weeklikse afspraak wat heenwys na die ewige rus (Heb. 4:3 tot 11) wat sal volg op die voltooiing van YHVH se plan van herstel.

Die eerste feesseisoen van Pesag word gevolg deur 49 dae van voorbereiding voor die begin van *Shavuot* op die vyftigste dag. Hierdie 49 dae staan bekend as die tel van die Omer (Hebreeus: *Sefirat HaOmer*).

יהוה *het met Moshe gepraat en gesê: "Praat met die kinders van Yisra'el en sê vir hulle: 'Wanneer julle in die land kom wat Ek julle gee en sy opbrengs oes, moet julle 'n gerf van die eerste vrugte van julle oes na die priester bring. Hy moet die gerf voor die Teenwoordigheid van יהוה waai, om vir julle aanvaar te word; op die dag ná die Shabbat moet die priester dit waai. Op die dag as julle die gerf waai, moet julle 'n lam in sy eerste jaar, sonder gebrek, as brandoffer tot יהוה offer. Sy graanoffer daarmee saam, moet twee tiendes van 'n efa fynmeel met olie gemeng wees, as 'n offer, deur vuur, gebring tot יהוה, 'n*

*aangename geur en sy drankoffer moet 'n kwart hin wyn wees. Julle mag geen brood of gebraaide graan of vars graan eet tot op daardie selfde dag dat julle die offer tot julle God bring nie. Dit is 'n ewige instelling vir al julle geslagte, oral waar julle bly. Julle moet tel van die dag ná die Shabbat, van die dag af wanneer julle die gerf van die waaioffer bring, sewe Shabbatte moet voltooi wees; tot die dag ná die sewende Shabbat moet julle vyftig dae tel; dan moet julle 'n nuwe graanoffer tot יהוה bring.*

Lev. 23:9 tot 16 (PWL Vertaling<sup>1</sup>)

Die tel van die Omer begin op die dag van die Fees van die Eerstelinge. Dag een van die tel van die Omer is dus die dag wanneer die gerf van die waaioffer (beweegoffer) voor YHVH gebring was (Lev. 23:15).

Die gerf van die beweegoffer word in Hebreeus die *omer* genoem en beteken 'n droë maat van ongeveer 'n tiende efa (ongeveer 2 liters) of 'n gerf. Die *omer* tydens die Fees van Eerstelinge was gars wat in die *aviv* stadium van rypwording was. Gars was die eerste van die graanoes, terwyl die koring as offer gedurende *Shavuot* (Pinksterfees) gebring was. Die drankoffer van 'n kwart-hin wyn was ongeveer 1,5 liter (1 hin is ongeveer 6 liter).

### **Hoekom die tel van die Omer?**

Die Skrifte gee geen verduideliking hoekom die dae vanaf Pesag tot en met *Shavuot* getel moet word nie. Ons is egter almal van kleintyd af bekend met die tel van die dae tot en met 'n belangrike gebeurtenis of afspraak. Hierdie tel van die dae gaan gepaard met 'n opgewondenheid en verwagting. Dikwels behels dit ook voorbereiding vir die geleentheid. In hierdie lig moet die tel van die Omer gesien word: Ons tel die dae tot die volgende afspraak met ons Vader.

Hierdie tel van die Omer is 'n reis van 49 dae van selfondersoek. Dit is 'n voorbereidingsproses in afwagting vir die seën van *Shavuot*. Ons tel die Omer met opgewondeheid en 'n verwagting vir die aanbreek van *Shavuot*!

Die tel van die Omer kan ook beskou word as 'n tyd van *teshuvah* wat *terugkeer* beteken. *Teshuvah* is om terug te keer na Torah, naamlik na YHVH se liefdevolle onderrig vir 'n lewe as geregverdigde in Yeshua Messias. Dit is om met berou en verootmoediging "terug te keer" nadat selfondersoek gedoen is van jou geestelike welstand en van jou verhouding met Vader-God.

Die 49 dae van tel van die Omer en die 40 dae *teshuvah* voor *Yom Kippur* is beide 'n tydperk van voorbereiding om YHVH te ontmoet. Beide is om *teshuvah* te doen. Die verskil is egter die volgende: *Teshuva* tydens die tel van die Omer word uit liefde en dankbaarheid gedoen, terwyl *teshuva* tydens die 40 dae voor *Yom Kippur* deur 'n element van vrees gemotiveer word. Tydens die tel van die Omer doen ons *teshuvah* in voorbereiding en afwagting van 'n 'geskenk', naamlik Torah, wat ons op *Shavuot* (Pinkster) gaan ontvang (en ontvang het). Maar die 40 dae van *teshuvah* voor *Yom Kippur* is in voorbereiding en afwagting van YHVH se oordeel op hierdie dag. Die eerste word uit liefde gedoen en die tweede grootliks uit vrees.

<sup>1</sup> PWL Vertaling (Pad van Waarheid tot die Lewe) kan gratis afgelaai word by [www.padwlewe.ch](http://www.padwlewe.ch)

Die tel van die Omer is die selfondersoek en voorbereiding om weer soos Israel van ouds by Sinai te staan en opnuut YHVH se Torah in ons harte en verstand te ontvang. Dit is 'n geleentheid vir elkeen om sy geestelike huis in orde te kry!

*Want dit is die verbond wat Ek ná dié dae sal sluit met die huis van Israel, spreek YHVH: Ek sal my wette in hulle verstand gee en dit op hulle hart skrywe; en Ek sal vir hulle 'n God wees, en hulle sal vir My 'n volk wees.*

Heb. 8:10

*En Ek sal die Vader bid, en Hy sal julle 'n ander Trooster gee om by julle te bly tot in ewigheid. Joh. 14:16*

*maar die Trooster, die Afgesonderde Gees, wat die Vader in my Naam sal stuur, Hy sal julle alles leer en sal julle herinner aan alles wat Ek vir julle gesê het.*

Joh. 14:26

Die 40 dae van *teshuvah* tot en met *Yom Kippur* is die selfondersoek en voorbereiding om voor YHVH te staan as Torah-gehoorsame volgelinge van Yeshua. Dit is 'n geleentheid vir elkeen om seker te maak sy geestelike huis is in orde.

*En sy heer sê vir hom: Mooi so, goeie en getroue dienskneg, oor weinig was jy getrou, oor veel sal ek jou aanstel. Gaan in in die vreugde van jou heer.*

Matt. 25:21.

### **Wat het op *Shavuot* gebeur?**

In die lig Lev. 23:9 tot 16 kan ons met sekerheid aanvaar dat die dissipels as Torah-gehoorsame volgelinge van Yeshua ook die Omer getel het. Daarom het Yeshua se volgelinge op *Shavuot* (Pinksterdag) bymekaar gekom om hierdie bestemde tyd van YHVH te gedenk. As Hebreërs (Jode) wat goed in Torah onderrig was, het hulle geweet wat op *Shavuot* gedenk word, naamlik die gee van Torah (die wet – die Vader se onderrig en instruksies) aan hulle voorgeslagte by die berg Sinai. Hierdie gebeurtenis was so belangrik dat die dae vanaf die herdenking van hulle bevryding uit Egipte (Pesag) tot *Shavuot* (die herdenking van die gee van die Torah) getel was.

Maar wat het toe gebeur op die eerste *Shavuot* na Yeshua se hemelvaart? Terwyl hulle besig was om die gee van Torah te gedenk het YHVH Sy Gees vir hulle gegee, naamlik die krag om Torah-gehoorsam te wees. YHVH het Sy belofte soos deur die profeet Jesaja gespreek is, waar gemaak:

*Hierdie is egter die verbond wat Ek ná daardie dae met die huis van Yisra'el sal sluit," verklaar יהוה: "Ek sal My wet binne-in hulle sit en dit op hulle verstand, wil en emosie skryf en Ek sal hulle God wees en hulle sal My volk wees. Hulle sal nie meer elkeen sy naaste en elkeen sy broer leer nie en sê: 'Ken יהוה,' want hulle sal My almal ken, van die kleinste tot die grootste van hulle," verklaar יהוה.*

Jer. 31:33 en 34 (PWL Vertaling).

Die Vleesgeworde Woord van YHVH, Yeshua, was gegee aan die dissipels op 'n unieke wyse, naamlik deur dit in elkeen se verstand, wil en emosie te gee en op elkeen se hart te skryf sodat elkeen YHVH waarlik kan ken. Dit was nie meer woorde – YHVH se Torah – op klip nie, maar nou die Woorde (die Torah) van YHVH se krag (Heb. 1:3) in hulle binneste. Hierdie Gees-geskrewe Woorde van YHVH was nou deel van hulle verstandelike vermoë en deel van hulle hartsbegeerte. Dit was nou 'n innerlike krag wat uiterlik sigbaar geword het deur woorde en daede (tekens en wonders).

Pesag is die herdenking van die begin van ons vryheid en *Shavuot* is die herdenking van ons Geesgegewe vermoë om as bevrydes volgens YHVH se Torah, Sy liefdevolle onderrig en instruksies, te lewe!!!

Daarom kan ons ook die dae met afwagting tot *Shavuot* tel, want ook hierdie afspraak met die Vader sal 'n bevestiging en vernuwning van Sy belofte van die gebeure van *Shavuot* wees.

Laat ons nie stilstaan by die doop van bekering (Pesag) nie, maar aan beweeg na die doop deur Yeshua in die Afgesonderde (Heilige) Gees (*Ruach HaKodesh*) en met vuur (*Shavuot*)(Matt. 3:11). Hierdie doop is YHVH se krag tot gehoorsaamheid aan Sy onderrig en instruksies vir 'n leefwyse as geregverdigde en vir tekens en wonders wat sal volg!!

Daarom is dit gepas om daagliks tydens die tel van die Omer ondermeer Psalm 119 te lees en te bepeins, want hierdie is 'n lofpsalm oor die heerlijkheid, goedheid en wonders van Torah.

Sonder Torah kan daar geen ware vryheid wees nie, en sonder die Afgesonderde Gees sal ons nie die krag tot gehoorsaamheid hê nie. Tekens, wonders en gehoorsaamheid gaan hand aan hand. YHVH het dit alles op *Shavuot* moontlik gemaak.

**Nota:** Onderstaande tabel is 'n hulpmiddel van hoe Ps. 119 en ander psalms daagliks gelees en bepeins kan word tot en met dag 49 van die tel van die Omer.

*Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).*

Shalom.  
Johan.

*Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.*

## Tel van die Omer volgens Psalm (Tehillim) 119 en ander Psalms

Omer dag 1	Psalm 119:1-8
Omer dag 2	Psalm 119:9-16
Omer dag 3	Psalm 119:17-24
Omer dag 4	Psalm 119:25-32
Omer dag 5	Psalm 119:33-40
Omer dag 6	Psalm 119:41-48
Omer dag 7	Psalm 119:49-56
Omer dag 8	Psalm 119:57-64
Omer dag 9	Psalm 119:65-72
Omer dag 10	Psalm 119:73-80
Omer dag 11	Psalm 119:81-88
Omer dag 12	Psalm 119:89-96
Omer dag 13	Psalm 119:97-104
Omer dag 14	Psalm 119:105-112
Omer dag 15	Psalm 119:113-120
Omer dag 16	Psalm 119:121-128
Omer dag 17	Psalm 119:129-136
Omer dag 18	Psalm 119:137-144
Omer dag 19	Psalm 119:145-152
Omer dag 20	Tehillim 119:153-160
Omer dag 21	Tehillim 119:161-168
Omer dag 22	Tehillim 119:169-176
Omer dag 23	Psalm 1
Omer dag 24	Psalm 11
Omer dag 25	Psalm 16
Omer dag 26	Psalm 19
Omer dag 27	Psalm 25:4-10
Omer dag 28	Psalm 63
Omer dag 29	Psalm 67
Omer dag 30	Psalm 78:1-16
Omer dag 31	Psalm 78:17-31
Omer dag 32	Psalm 78:32-39
Omer dag 33	Psalm 78:40-55
Omer dag 34	Psalm 78:56-72
Omer dag 35	Psalm 93
Omer dag 36	Psalm 94:12-23
Omer dag 37	Psalm 95
Omer dag 38	Psalm 96
Omer dag 39	Psalm 98
Omer dag 40	Psalm 99
Omer dag 41	Psalm 103
Omer dag 42	Psalm 105:1-11
Omer dag 43	Psalm 106:1-5
Omer dag 44	Psalm 111
Omer dag 45	Psalm 112
Omer dag 46	Psalm 128
Omer dag 47	Psalm 130
Omer dag 48	Psalm 148
Omer dag 49	Psalm 138